

全上古三代秦漢三國六朝文

全後周文卷十

烏程嚴可均校輯

庾信三

爲閭大將軍乞致仕表

臣某言、臣聞禮云、大夫七十致仕于朝、傳家于子、膳則貳珍、衣稱時制、臣自出身奉國四十餘年、遭遇風雲、從微至著、太祖文皇帝扶危濟難、奄有關河、臣實無堪、中涓從事、自洛食風塵、河梁旗鼓、華陰有白馬之兵、河曲有黃沙之陣、臣雖用命、不能奇策、功薄賞厚、因人成事、恩澤年表、常曰愧心、仰逢周朝、臣揖讓登庸、謳歌受命、主貴臣遷、頻煩榮寵、三槐曰鑄鼎象物、知其神姦、五等曰桓珪飾瑞、守其宮室、臣曰何德兼而有之、況復水土之職、王梁曰應讖受徵、兵戈之玉、韓信曰登壇獨拜、語其連類、臣又何人、當今四海未寧、三方鼎峙、陛下勞心之日、羣公展効之秋、而臣甲子既多、耄

年又及、無參賓客之事、謬達諸侯之班、尸祿素餐、久紊彝典、負乘致寇、徒煩有司、加已寒暑乖違、節宣失序、風水交侵、菁華已竭、雖復廉頗強飯、馬援據鞍、求欲報恩、何能爲役、榮啓期之樂、適足自貽、燭之武之言、無能爲也、特乞解所居官、言從初服、事符骸骨之請、非謀几杖之賜、若臣北陵移病、東臯歸老、山河茅社、一反司勳、公侯珪璧、還封典瑞、則朝無冒位之人、臣免妨賢之責、虞氏養老、敢希東序之榮、周朝如荼、豈望西郊之禮、但瞻仰天威、方違咫尺、徘徊城闕、私增悽戀、不任知止之情云云

文苑英華  
六百三

代人乞致仕表

臣邈言、臣聞一葉將隕、寧待于風露、百川皆到、自竭者潢汚、臣輒感之、已悲已咽、臣某中謝、臣仲春之末、舊患漸加、雙足頗蹇、四支不利、扶步有邯鄲之失、勉視無離婁之明、安可率此畱務、涸竝恆典、陛下恩周曲成、未忍捐棄、微臣困至于亟、轉不堪勝、臣所已自

咎自傷淚繼之血臣某中謝臣特承先緒進不以人陛下憫臣無  
用舉直而有愆自奉詔太極宣緯中書陛下收臣于一心任臣以  
獨掌九年冀登宰輔八歲載踐宗伯出擁千旄入參衡鏡或雲臺  
之上微臣預疇咨之旨或日觀之下詔臣操刊勒之文美而賜之  
臣實尤忝明憲不敢曰纖負玄造竟微于滴助口口口口口口口  
口其如冰炭交集誠懷伏日前陪政事親荷德音謂臣等經侍軒  
墀子孫尚延保護臣荷螻蟻歟戴丘山臣宜生亦盡命死且陳力  
竊不知終而不知止朝列三數與臣同儕臣未六十推臣則幼獨  
臣彌當頓頌病不俟年盈量窮涯滿而招損逾時每乖于勿藥永  
日猶繫于苞桑覽分必然貪榮所忌伏乞免臣見職退畢餘生察  
臣榮不可支矜臣分不能強迺臣之幸也豈悟仁壽之闕有此一  
時承明之廬無緣再謁心神已瘳晷刻增悲叨睿鑒則多士莫先  
違聖顏則小臣何遠惟冀三條啓道萬乘巡京悅西怨之羣黎逮

東封之從者危魂倘駐枯骨如存是臣之愜非臣所望臣又聞驅  
奔效駕先輟于羸駘翔集賀成近遺于鐵翮彼常知暮而況臣哉  
臣未遑請臣之懇戀至于際官臣合書罪無任戰慄懇結之至

文苑

英華六  
百三

### 爲齊王進蒼鳥表

臣某言臣聞飛南陽之雉尙闡霸圖下建章之鵠猶調和氣況乃  
虞庭告瑞姬社呈祥咸高識哺之心實貴能知之性伏惟皇帝陛  
下德教百姓孝刑圓海攝提從紀天下文明是已東海輸禽乍改  
黔質西山度羽或變蒼精臣去月三十日行到陝州獲大都督莫  
仁回樂列稱于州射堂內見一蒼鳥林薄回翔循環不去駐乘木  
之精轉司風之翼卽召儀同某甲等同時觀見斯實禮敬所覃孝  
慈之感理宜歸瑞祕圖書祥帝冊用光至德取效升平無令赤鳳  
畱止偏爲瘞玉之歌玄鶴徘徊獨擅銜珠之舞

爲齊王進赤雀表

臣某言、臣聞南陽雉飛、尚論秦霸、建章鵠下、猶明漢德、當今天不  
愛寶、地必呈祥、自應長樂觀符、文昌啟瑞、伏惟皇帝欽明文思、惟  
日勅勞成務、祿象日月、允釐百工、海水無波、天星不動、去四月十  
三日、獲隴右符、府參軍李暉、牒傳戶屬、秦州清水郡伯陽縣文谷  
林在家庭、獲一赤雀、光同朱鳳、色類丹鳥、降火飛精、似入公車之  
府、流金成製、碧上凌雲之臺、謹案赤雀銜書、止于鄴、反周之受命、  
興乎此祥、卽事所觀、同符合契、實可圖形瑞譜、書頌儒林、事足成  
臺、名堪紀號、豈直雲中太守、見赤心之奉主、蓬萊童子、知白環之  
報恩、臣等預觀休徵、情迫恆慶、不任鳬藻之至、  
文苑英華  
六百十二

進象經賦表

臣某言、臣伏讀聖製象經、許觀象戲、私心踴躍、不勝忭舞、伏已性  
與天道、本絕尋求、直已懸諸日月、遂獲瞻仰、九州既奠、近對河圖、

四轍中繩、金觀玉策、未飛玄鶴、先聞金石之聲、不上赤城、獨見煙霞之氣、置管而測、光景愈高、沈玉而觀、淵泉益遠、寢不自涯、課虛爲賦、詞非寥亮、學無雕刻、遂敢陳述、誠爲厚顏、況復日之遠近、本非童子所問、天之渾蓋、豈是書生所談、冒用奏聞、伏增流汗之至、

文苑英華  
六百一十

爲齊王進白兔表

臣聞與圖欲遠、則玉虎晨鳴、轍迹方開、則銀蟾入貢、伏惟陛下明  
明在上、翼翼居尊、德動天關、威移地軸、是已風煙照燭、毛羽禎祥、  
史不絕書、府無虛日、臣受服元戎、用綏邊鄙、轅門所屆、始次熊山、  
前茅慮無、乃獲白兔、光鮮越雉、色麗秦狐、月德徵符、金精表瑞、呈  
祥興頌、效異披圖、尊敬之迹、既明、應事之機、斯兆、臣之龔行、實從  
陝略、瑞已素質、彌雄西氣、庶重承廟算、方事申威、揜代偃齊、分韓  
裂趙、不任鳧藻踴躍之情、

文苑英華六百十二又藝文類  
聚九十五引光鮮越雉四句

謝明皇帝賜絲布等啟

臣某啟、奉敕垂賜雜色絲布、綿絹等三十段、銀錢二百文、某比年  
已來、殊有闕乏、白社之內、拂草看冰、靈臺之中、吹塵視甌、慰憂  
棄既、嗟且惜、瘠子羸孫、虛恭實怨、王人忽降大賚、先臨天帝、錫年  
無論此樂、仙童贈藥、未均斯喜、張袖而舞、玄鶴欲來、撫節而歌、行  
雲幾斷、所謂舟楫無岸、海若爲之反風、薺麥將枯、山靈爲之出雨、  
況復全抽素匱、雪坂疑傾、併侏青鳧、銀山或動、是知青牛道士、更  
延將盡之命、白鹿真人、能生已枯之骨、雖復拔山超海、負德未勝、  
垂露懸針、書恩不盡、蓬萊謝恩之雀、白玉四環、漢水報德之螭、明  
珠一寸、某之觀此、寧無愧心、直已物受其生、于天不謝、謹啟

六百五十五

謝趙王賚絲布等啟

某啟、鄭叔至、蒙賜絲布綾等十段、王褒至、又蒙許賜錢等、望外之



恩實符大賚非常之錫乃溢生涯曳練且觀無勞白馬之望流泉  
欲委佇見青鳬之飛楊池掘荷李園移樹既欣谷和彌思青木一作  
林陳畱下粟有愧深恩櫟陽雨金翻慚曲施靈臺久客從此數炊  
黍谷長寒于今更暖從雲夢之田不踰此樂得豐城之劍未均斯  
喜謹啟文苑英華六  
百五十五

謝趙王賚絲布啟

某啟奉敎垂賚雜色絲布三十段去冬凝閉今春嚴勁霰似瓊田  
淩如鹽浦張超之壁未足鄣風袁安之門無人開雪覆烏毛而不  
暖然獸炭而逾寒遠降聖慈曲垂矜賑論其蠶月殆罄桑車津實  
秉杼幾空織室遂令新市數錢忽疑販絲平陵月夜驚聞擣衣妾  
遇新緜自然心伏妻聞裂帛方當含笑莊周車轍實有涸魚信陵  
鞭前元非窮鳥仰蒙經濟伏荷深慈謹啟文苑英華六  
百五十五

某啟某息荀娘昨蒙恩引曲賜絲布等五段南冠獲宥既預禮延

稚子勝衣還蒙拜識關尹津梁之織鄴地雙絲扶風彩文之機仙  
園獨聖青衿宜襲書生無廢學之詩春服既成童子得雩沂之舞  
況復栖鳥挾子同知桂樹之恩澤雉將雛共喜行春之令根株一  
潤枝葉俱榮謹白

文苑英華六  
百五十五

謝趙王賁白羅袍袴啟

魏文類聚  
白作阜

某啟垂賚白羅袍袴一具程據上表空論雉頭王恭入雪虛稱鶴  
氅未有懸機巧絲變躡奇文鳳不去而恆飛花雖寒而不落披千  
金之暫暖棄百結之長寒永無黃葛之嗟方見青綾之重對天山  
之積雪尙得開衿冒廣廈之長風猶當揮汗白龜報主終自無期  
黃雀謝恩竟知何日

魏文類聚八十五文  
苑英華六百五十五

謝趙王賁犀帶等啟

某啟奉敎垂賚犀裝帶錢十貫魏君寶帶特賜劉楨趙王國租偏  
資裴楷貫藏文馬如燒安息之銀帶插通犀似獵雲南之獸北郭

騷之長貧，是所甘愜。南宮敬之載寶，殊非念望。花開四照，唯見其榮。鼇戴三山，深知其重。昔沈義將盡，逢司命而還生。士變行埋，值仙人而更活。今日慈矜，斯之謂矣。馬前驅而導路，或似識恩。雞未曉而開闢，容能報主。謹啟。文苑英華六百五十五

謝趙王賚米啟

某啟。奉教垂賚米十石，丹烏銜穗，既集西周。黃雀隨車，還飛東市。漬而爲種，不無霜雪之精。取已論兵，卽有山川之勢。某陋巷簞瓢，櫛風沐雨。剝榆皮于秋寒，掘蟄蠶于寒山。仰費國租，遂開塵甑。非丹竈而流珠，異荆臺而炊玉。東方朔之捧米，既息長飢。西門豹之墾田，方慙此賚。魏文類聚七十二文  
苑英華六百五十五

謝趙王賚乾魚啟

某啟。蒙賚乾魚十番，醴水朝浮，光疑朱鼈。文鯢夜觸，翼似青鸞。況復洞庭鮮鮓，溫湖美鯽。波瀾成雨，鱗甲防寒。某本吳人，常想江湖。

之味及其飢也唯資藜藿之餘慈資渥恩膏腴流寵不勞獅子之  
亭卽勝雷池之長翻驚河伯獨不受人足笑任公終年垂釣謹啟  
文苑英華六  
百五十五

謝趙王賁雜啟

夏翟秋飛江輦春淵中牟縣之客遂得坐觀賈大夫之妻已應含  
笑仰費中廚來供下客山川道遠口腹知恩藝文類聚九十

謝趙王賁馬并繖啟

某啟奉敎垂賚紫驪馬并銀釘乘具紫油繖一張上天降雨特垂  
深澤若水流光偏蒙私照迴茲翠蓋事重劉基之恩降此青驪榮  
深李忠之賜北部丹帷便須高捲西河竹馬卽已郊迎在命之輕  
鴻毛浮于弱水知恩之重箠背負于靈山況復驚鴻別水但見徘徊  
黃鶴去關唯知反顧棲戀之心事同于此文苑英華六  
百五十五

謝滕王賁巾啟

某啟奉敎垂賜鹿子巾一枚解角新胎戴滕初孕落星交映連珠  
疏點盤龍之刀既剪長命之縷仍縫翠羽懸推芙蓉高讓遊斯隱  
士足笑鼓皮入彼春林方誇荀穉某蓬鬢鬆颰衰容耆朽三秋不  
沐實荷今恩十年一冠彌欣此賚謹啟

文苑英華六  
百五十五

謝滕王賚馬啟

某啟奉敎垂賚烏駟馬一匹柳谷未開翻逢紫蓋臨源猶遠忽見  
桃花流電爭光浮雲連影張敞畫眉之暇直走章臺王濟飲酒之  
歡長驅金埒謹啟

藝文類聚九十三文  
苑英華六百五十五

謝滕王賚猪啟

某啟奉敎垂賚肥豕一腔白腹見珍度遼東之水赤關爲重對襄  
陽之城忽降全恩謹充炮烙孫弘牧于溜水唯呂求錢卜式養于  
上林豈知其味謹啟

文苑英華六  
百五十五

謝滕王集序啟

某欣伏覽制垂賜集序紫微懸映如傳闕里之書青鳥遙飛似送  
層城之璧若夫甘泉宮裏玉樹一叢玄武闕前明珠六寸不得譬  
此光芒方斯照燭有節有度卽是能平八風愈昌愈高殆欲去天  
三尺殿下雄才蓋代逸氣橫雲濟北顏淵關西孔子譬其毫釐則  
風雨爭飛論其文采則魚龍百變蒲桃繞館新開碣石之宮修竹  
夾池始作睢陽之苑琉璃汎酒鸚鵡承杯鳳穴歌聲鸞林舞曲況  
復行雲逐雨迴雪隨風湖陽之尉旣成爲喜之因春陵之侯便是  
銷憂之地某本乏材用無多述作加已建鄴陽九劣免儒礪江陵  
百六幾從士隴至如殘編落簡竝入塵埃赤軸青箱多從灰燼比  
年痾恙彌留光陰視息桑榆已逼蒲柳方衰不無秋氣之悲實有  
途窮之恨是已精采舊亂頗同宋玉言辭蹇吃更甚揚雄一吟一  
詠其可知矣好事者不求知音者不用非有班超之志遂已棄筆  
未見陸機之文久同燒硯至于凋零之後殘缺所餘又已雜用補

袍隨時覆醬、聖慈憐愍、遂垂存錄。始知逾揚過差，君子失辭，比擬從橫，小人迷惑。荆玉抵鵲，正恐輕用重寶；龍淵削玉，豈不徒勞神慮。匠石迴顧，巧材變于彫梁；孫陽一言，奔蹏成于駿馬。故知假人延譽，重于連城；借人羽毛，榮于尺玉。溟池九萬里，無踰此澤之深；華山五千仞，終愧斯恩之重。卽日金門細管，未動春灰；石壁輕雷，尙藏冬蟄。伏願聖躬與時納豫，南陽寶雉，幸足觀瞻；鄴縣菊泉，差能延壽。伏遲至鄴，可期從梁有日；同杞子之盟會，必欲瞻仰風塵。共辭侯而來朝，謹當逢迎冠蓋。魚腸尺素，雁足數行。書此謝辭，終知不盡。謹啟。

文苑英華六百五十六

謝趙王示新詩啟

某啟：鄭叡至，奉手教累紙，并示新詩。八體六文，足驚毫翰；四始六義，實動性靈。落落詞高，飄飄意遠。文異水而湧泉，筆非秋而垂露。藏之山嶽，可使雲霧鬱起；濟之江浦，必當蛟龍繞船。首夏清和，聖

躬怡裕、琉璃彤管、鵲顧鸞迴、婉轉綠沈、猿驚雁落、下風傾首、日  
爲年、健爲舍人、實有誠願、碧雞主簿、無由遂心、寂寞荆扉、疏蕪蘭  
徑、驂駕來梁、未期卜日、遣騎到鄴、希垂枉道、文苑英華八  
百五十六

答趙王啟

某啟、仰承張幕、全韓連營、上地、澠池置陳、解鄧禹之圍、函谷開關、  
削王元之印、絳旗朝上、刁斗夜鳴、彌雄壯士之心、足起橫行之志、  
況復才人出娉、還得賢夫、塞外有夫人之城、軍中有女子之氣、都  
尉青旗、卽時春色、將軍大樹、已復花開、雲氣浮壘、流星汎枕、細舞  
長歌、橫簫直笛、當乎此時、青雲之上、信不學無術、本分泥沈、忽逢  
天造、搜揚側陋、今者遂總憲司、預聞刊鼎、獻歲刑書、旣應懸法、上  
春木鐸、方須徇人、但年髮已秋、性靈久竭、嘉石肺石、無已測量、舌  
端筆端、惟知繁擁、乖展一月、遂涉兩年、傾首東瞻、山河千里、風塵  
未盡、霜露沾衣、仰願珍宜、已爲身寶、謹啟、文苑英華六  
百六十五



荅移市敕

昔張楷碩儒、尙移弘農之市、宜官妙篆、猶致酒壚之客、況復德總  
卬周、聲高梁楚、希風慕義之士、舉袂成帷、臥轍反車之流、初學記  
卷之六 攀車之人、摩肩相接、遂使王充閱市之處、遠出荒郊、石苞販鐵之所、翻  
臨涯岸、聖德謙虛、未忘喧湫、欲令吹簫舞鶴、還反舊鄺、賈卜屠羊、  
請辭新闕、而交貿之黨、好畱幽岐之眾、難遣、初學記 初學記二十四  
移齊河陽執事文

下脫日字

周天和四年四月二十七、使持節車騎大將軍儀同三司大都督  
陝西總管府移齊河陽執事、自疆場臥鼓、邊鄙收烽、義讓之行、未  
能朞月、孔城誨盜、卽值苞藏、是已板載之師、須時而動、自安封域、  
非求拒防、雖復風塵蹙、旗鼓無侵、五將卽迴、雙嶠已靜、始奉朝  
旨、獲被移書、令受叛城、使迴軍實、想彼邊司、已奉處分、既有此還、  
輒須領納、未知何日、可遣戍兵、指附行人、遲能速報、盟且不渝、鄰

境相善顧瞻原野幸甚實多故移

文苑英華  
六百五十

周天和四年十一月十日陝州總管長史梁昕移齊河陽執事自  
拭玉繼書通關去傳實謂上方銷劍山陽息馬故茲禦客或慢重  
局屬彼司疆陰行善盜君一臣二上穆下垂國家已邊鄙心搖須  
固備守大司馬齊國公天子介弟中軍元帥駕馭孫吳驅馳貔虎  
舉因農隙義異城郎師巡我境會非反軋縮載之畢前旌已迴彼  
國兵馬不防殿後餘塵遂之相接建旌壘上未及五中安鄴城傷  
先驚七伏常時鋒刃或膏原野所獲彼將夏州刺史梁老首領今  
已相還尸鄉不遠無令久客馬驢甲兵具條相勒封人宜依領納  
宿無闕志不獲交綏致此埃塵誰階其咎故移

文苑英華  
六百五十

移虜畱使文

年月朔日某官告配某州郡前本欲發遣彼使但某人入境已來國  
祥甫邇自秋迄冬未申款接且狼星表邦嚴霜已戒浮河亂濟長

路苦寒時當獻歲惟新三元告慶珪瓊盈庭華裔參軫式觀盛禮  
洽此嘉譴陽和既動澤漸萬邦便當遣使相隨永敦鄰睦故移文

英華六  
百五十

爲梁上黃侯世子與婦書

昔仙人道引尙刻三秋神女將梳猶期九日未有龍飛劍匣鶴別  
琴臺莫不銜怨而心悲聞猿而下淚人非新市何處尋家別異邯  
鄲那應知路想鏡中看影當不含啼欄外將花居然俱笑分杯帳  
裏卻扇牀前故是不思何時能憶當學海神逐潮風而來往勿如  
織女待填河而相見

蘇文類聚  
三十二

趙國公集序

竊聞平陽擊石山谷爲之調大禹吹笛

初學記  
作笛

風雲爲之動與夫

含吐性靈抑揚詞氣曲變陽春光迴白日豈得同年而語哉柱國  
趙國公發言爲論下筆成章逸態橫生新情振起風雨爭飛魚龍

各變方之珪璧塗山之會萬重譬似初學記雲霞赤城之巖千丈

文參麻象卽入天官之書韻涉絲桐咸歸總章之觀論其壯也則

鵬起半天語其細也則鷦巢蚊睫豈直熊熊旦上增城初學記旦

肩抱日月之光燄燄宵飛南斗觸蛟龍之氣昔者屈原初學記宋

玉始于哀怨之深蘇武李陵生初學記于別離之世自魏建安之

末晉太康已來彫蟲篆刻其體三變人人自謂握靈蛇之珠抱荆

山之玉矣公斟酌雅頌諧和律呂若使言乖節目則曲臺不顧聲

止操縵則成均無取遂得棟梁文囿冠冕詞林大雅扶輪小山承

蓋藝文類聚五十五初學記二十一

賜進士出身三品銜廣東等處提刑按察使司按察使兼管驛傳事務黃岡王毓藻校刊

全後周文卷十終

全後周文卷十一

烏程嚴可均校輯

庾信四

自古聖帝名賢畫讚二十七首

黃帝見廣成子

治身紫府問政青丘龍湖鼎沒丹竈珠流與蘇文類聚作疏雲卽雨落木

先秋至道須極長生可求蘇文類聚十七文苑英華七百八十

堯登壇受圖

登壇洛汭沈玉河湄丹圖馭馬綠甲乘龜榮光上幕休氣連帷雖

存克讓終見文思蘇文類聚六十四文苑英華七百八十

舜舞干戚

平風變律擊石來儀先齊七政更服三危朱干獨舞玉戚空麾南

風一曲拱蘇文類聚作恭已無爲蘇文類聚十一文苑英華七百八十

禹渡江

三江初鑿九谷新成風飛鷁涌水起龍驚樂天知命無待憂生危

舟遂靜亂揖還平

藝文類聚十一御覽八十  
二文苑英華七百八十

湯祝解網

連珠兩起合玉雙沈穀為祥樹桑成樂林三方落網一面驅禽德

矣聖政

藝文類聚作  
德弓行政

仁平用心

藝文類聚十二文  
苑英華七百八十

武丁迎傅說

虞田路斷辭澗泉飛躬勞版築有弊韋衣賢臣入夢天賜無違干

嚴之下遂得同歸

文苑英華  
七百八十

文王見呂尚

言歸養老垂釣西川岸止磻石溪唯小舫風雲未感意氣怡然有

此相望于茲幾年

藝文類聚十二御覽八十  
四文苑英華七百八十

成王刻桐葉封虞叔

虞叔百里居河之汾帝刻桐葉天書掌文禮目成德樂目歌薰類聚天子無戲唐其有君苑英華七百八十

漢高祖置酒沛宮

遊子思舊來歸沛宮還迎故老更召歌童雖欣入沛方念移豐酒酣自舞先歌大風苑英華七百八十

漢武帝聚書

獻書路廣藏書府開秦儒出谷漢簡吹灰芝泥印上玉匣封來坐觀風俗不出蘭臺苑英華七百八十

袁盎諫文帝

千乘峻轍六轡危行跡迴松坂山糾柳城龍淵地狹華蓋風驚賢臣攬轡可謂忠貞初學記十七苑英華七百八十

朱雲折檻

上書直諫有忤明君先求斬馬遂請魚文身摧欄檻義烈風雲應



從御史翻頰將軍

初學記十七文苑英華七百八十

周公戒伯禽

伯禽居魯鳴玉來朝周公問政治國

文苑英華作周公政治爲國

風謠北山有

梓南山有橋禮容雖備俯仰無驕

蘇文類聚二十三文苑英華七百八十

五月披裘負薪

披裘當夏俗外爲心雖逢季子不拾遺金禽巢欲遠魚穴

文苑英華作沈

唯深清聲滅跡何必山林

蘇文類聚三十六文苑英華七百八十

王祥扣冰魚躍

王祥之母鮮鱗是求冰連釣浦疎塞寒流精誠有感無假沈鉤二

老同膳雙魚共浮

文苑英華七百八十

孫叔敖逢蛇

叔敖朝出容悴還家母氏顧訪知埋怪蛇爾有陰德陽報將加終

爲楚相卒有榮華

蘇文類聚九十六文苑英華七百八十

高鳳好書不知流麥

高鳳好學專心不迴流連經笥對翫書臺石門雲渡銅梁雨來麥  
流雖遠書卷猶開藝文類聚六十五文苑英華七百八十

張良遇黃石公

張良取履跪授無辭兵書一卷長者三期昔稱韓相今爲漢師穀  
城餘石還歸舊祠藝文類聚三十六文苑英華七百八十

師尙父授丹書

尙父一遇周王是親赤雀旣下丹書已陳自論秉鉞長別垂綸獨  
有礪石聖名渭濱文苑英華七百八十

樂啟期三樂

樂期三樂唯人與年夫子相遇卽曰爲賢性靈造化高風自然雅  
琴藝文類聚雖古獨有鳴絃藝文類聚三十六文苑英華七百八十

夫子見程生

程生夫子一遇相知薄言傾蓋桑陰遂移清陽共美賢聖同羈陳

詩難別贈絹傷離

文苑英華七百八十

鉏麇見趙盾

趙盾將朝端衣整笏鉏麇受命衝冠怒髮惆悵賢臣顧瞻城闕利

劍不抽青槐先絕

文苑英華七百八十

蔡澤就唐生相

蔡澤羈旅唐生決疑無勞神策不問靈龜富貴自取年壽須期雖

云異相會待逢時

藝文類聚七十五文苑英華七百八十

李陵蘇武別

李陵北去蘇武南旋歸驂欲動別馬將前河橋兩岸臨路悽然故

人此別知應幾年

文苑英華七百八十

樊噲見項王

樊噲將軍漢王車右不憚鋒刃何辭卮酒霸上屯軍鴻門固守持

謝范增唯留王斗

文苑英華七百八十

秦穆公飲盜駿馬

駿馬遇盜秦君不嗔先傾美酒翻畏傷人鄰兵向國窮寇侵秦千

時大盜還作功臣

藝文類聚九十三文苑英華七百八十

延陵季子遇徐君

徐君有禮季子惟賢經過一遇如舊依然人非別後心許生前長

松雖合寶劍猶懸

文苑英華七百八十

鶴讚

武成二年春二月雙白鶴飛集上林園大將鄭偉布弋設置竝皆

禽獲六翮已摧雙心俱怨相顧哀鳴孤雄先絕孀妻向影天子怒

焉信奏事階墀立使爲讚

九皋遙集三山迴歸華亭別唳洛浦仙飛不防離繳先遭見羈

藝文

類聚作

籠摧月羽弋碎霜衣塞傳餘號關承舊名南遊湘水東入

遼城雲飛欲舞、露落先鳴、大翮摧折、九門嚴閉、相顧哀鳴、肝心斷

絕、松上長悲、琴中永別、

藝文類聚九十文苑  
英華七百八十四

周使持節大將軍廣化郡開國公臣乃敦崇傳

崇恒州代郡鼓城縣廣義鄉孝讓里人也、昔壽臣建國、賜姓者十

二人、平陽舉賢、登朝者十六族、況復大電繞樞、流星入昴、派分源

別、幹其嗣興者乎、魏道武帝臣命世雄圖、飲馬河洛、兄弟十人

分爲十姓、辨風吹律、臣氏卽其一焉、五代祖邈驃騎大將軍開府

儀同三司營丘郡開國公、于時天道西北、旣稟謀謨、馬首東南、實

資匡贊、因臣封名、仍爲賜氏、與夫南公伯、卽有連類、宗則

疑樂正

非無準則、曾祖雙、執使持節驃騎大將軍司徒青兗二州刺史范

陽文昭公、洛食之始、上馬治國、登庸之初、昇槐論道、生則絕席武

宮、死則配祠清室、夫人太原王氏、三世爲將、四代爲公、社稷大宗

鐘鼎貴族、伉儷是歸、秦晉匹也、祖提使持節衛將軍駙馬都督河

交二州刺史靈壽縣開國公公子公孫聲名籍甚增輝增耀弱冠  
昇朝夫人清廉郡長公主孝文帝之第二女也王姬有行車服不  
繫故得衛青上將張耳賢夫父願使持節大都督徐州諸軍事徐  
州刺史平陽縣開國公食邑四千戶少年習象多見兵書澆沙聚  
石之營卻日橫雲之陣彎弧則戟破小支抽劍則泉飛枯井夫人  
宇文氏周文皇帝之第三妹也母儀令範女師賢哲德高隆慮義  
重河陽魏受其終周新其命式墓封墳追旌盛德乃贈使持節大  
將軍廣化郡開國公食邑一千戶夫人贈安德郡長公主遊魂冤  
結非無廣漢之城久客思歸唯有東平之樹自永安已來魏室大  
壞海水羣飛天星亂動禮樂征伐不出于人主舉賢誅暴議在于  
強臣高丞相驅率風雲奄荒齊晉我舅氏文皇帝駕馭龍虎據有  
周秦南北淪盟東西敵怨既而各受圖書竝當珪璧百姓則父南  
子北兄東弟西事主則憂親求生則慮禍大周親戚徧鍾塗炭輪

之城旦下之織室、關河嚴隔三十餘年、天厭喪亂、人思反德、彼之風塵、旣靜函谷、此之冠蓋、屢涉漳濱、中山冤枉之餘、代郡凋殘之澤、竝遇革音、咸蒙禮送、崇賓兄弟二人、相看氣息、親愛凋零、方寸久亂、恆山殺嗣、豈望同飛、而安國徒中、鬱爲卿相、班超絕域、遂得生還、天和四年、至于新邑、朝廷呂舅甥之國、外內之親、乃授賓使持節、驃騎大將軍、開府儀同三司、大都督、安樂縣、安國公、食邑一千戶、賓得免虎口、仍上龍門、聲價已高、風焱即遠、方欲討論國恥、伸雪家冤、橫尸原野、是所甘心、時不我與、先從朝露、春秋若干、衛國興文子之慟、長安有詔葬之悲、乃贈本官、加少傅、蒲虞勳三州諸軍事、蒲州刺史、呂天和六年某月日、葬于長安之洪瀆原、妻青州石氏、長城郡君、肩子孤煢、生妻嫠室、卽能有節、還成守義、崇蒙授使持節、大都督、驃騎大將軍、開府儀同三司、廣化縣、開國公、食邑一千戶、昆季二人、同年上將、彤廷交映、榮戟相臨、昔二馮同

德繼踵當官兩杜齊名、夾河爲郡、比斯榮寵、彼將慙色、俄然賓疾、奄捐館舍、崇兄弟勝衣、備罹禍酷、同氣長養、得及全人、今者來歸、更連凶閔、每一悲慟、行路傷心、撫養愛子、情深馬援之慈、恭事寡嫂、義甚顏含之孝、天和六年、授大將軍、餘如故、龍庭賞出塞之功、玉門勞旋師之寵、異代同和、見之今日、建德二年、授使持節都督宜州諸軍事、宜州刺史、忽忽橫閭、但有誦書、曖曖重帷、惟聞善政、清不置水、明非舉燭、乃是入境移風、非直停車待雨、有敕大將軍宜州刺史廣化郡公崇、自夏季無雨、已迄于今、雖靡神不禱、仍未降感、知彼州內、獨蒙滂澤、諒由大將軍精誠所至、憂念郡人、豐稔可希、良已爲慰、又敕廣化公崇、知此存心政術、泊勤黎人、受委稱職、嘉尚無已、古人有言、非行之難、念加勩勩、已致盡善、指令宣納、抑操賜齊、陳物如別、宜諭朕懷、昔陽平太守、別降紅粟之恩、荊州刺史、偏蒙袞衣之賜、治績尤異、此之謂乎、崇清淨爲政、廉明爲法、



人不忍背、吏不忍欺、性不飲酒、無所嗜欲、深沈牆仞、喜愠不形、文必正詞、絃惟雅曲、仁義禮節、是所用心、緹袂紉素、愛翫無已、當今四郊多壘、尙有公卿之辱、鼓鼙不息、猶勞將帥之謀、語其讐恥、唯願橫行死地、思其報國、不爰身膏原野、但今天假之年、時綏之福、忠貞之事、公其取焉、略書梗槩、陳之直史、文苑英華七百九十二

擬連珠四十四首

蓋聞經天緯地之才、拔山超海之力、戰陣勇于風颯、謀謨出乎智臆、斬長鯨之鱗、截飛虎之翼、是曰一怒而諸侯懼、安居而天下息、蓋聞蕭曹贊務、雄略所資、魯衛前驅、威風所假、是曰黃池之會、可曰爭長、諸侯鴻溝之盟、可曰中分天下、

蓋聞解封豕之結、塞長蛇之源、必須製裳千里、唾血轅門、是曰開百里之圍、用陳平之一策、盟千乘之國、須季路之一言、

蓋聞得賢斯在、不藉揮鋒股肱、良哉、無論應變、是曰屈完參乘、諸

矣解方城之圍于木爲臣天下無西河之戰

蓋聞邯鄲已危徒思馬服薊城去矣空用荆軻是曰竹杖扶危不能止武擔之后蘆灰縮水不能救宣房之河

蓋聞穴蟻銜泉未知遠慮立禽巢幕何能支久是曰大廈旣焚不可灑之曰淚長河一決不可障之曰手

蓋聞膏唇喋喋市井營營或曰如賀自進或曰狙詐相傾是曰子貢使乎五都交亂張儀見用六國縱橫

蓋聞謀猷是習權變須長時增齊竈或臥燕窩是曰井陘之兵如鴻毛之遇火長平之卒若秋草之中霜

蓋聞彼黍離離大夫有喪亂之感麥秀漸漸君子有去國之悲是曰建章低昂不得猶瞻灞岸德陽淪沒非復能臨偃師

蓋聞市朝遷貿山川悠遠是曰狐兔所處由來建始之宮荆棘參天昔日長洲之苑

蓋聞天方薦瘥、喪亂弘多、空思說劍、徒聞枕戈、是曰劉琨之英略、莫知自免、祖逖之慷慨、裁能渡河、

蓋聞穀林長遠、蒼梧不從、惟桐惟葛、無樹無封、是曰隋珠日月、無益驪山之火、雀臺絃管、空望西陵之松、

蓋聞雷驚獸駭、電激風驅、陵歷關塞、枕跨江湖、是曰城形月偃、陣氣雲鋪、非綠林之散卒、卽驪山之叛徒、

蓋聞死別長城、生離函谷、遼東寡婦之悲、代郡孀妻之哭、是曰流慟所感、還崩杞梁之城、灑淚所沾、終變湘陵之竹、

蓋聞三世用兵、旣非貽厥、陰謀累葉、必曰凶終、是曰李都尉之風、霜上蘭山而箭盡、陸平原之意、氣登河橋而路窮、

蓋聞營魂不反、燐火宵飛、時遭獵夜之兵、或斃空亭之鬼、是曰射聲營之風雨、時有冤魂、廣莫郡之陰寒、偏多夜哭、

蓋聞江黃戎馬之徼、鄢郢風飄之格、乍有去而不歸、或無期而遠、

各是曰章華之下、必有思子之靈、雲夢之儗、應多望夫之石

蓋聞無怨生離、恩情中絕、空思出水之蓮、無復迴風之雪、是曰樓中對酒、而綠珠前去、帳裏悲歌、而虞姬永別

蓋聞樹彼司牧、既懸百姓之命、及乎厭世、復傾天下之心、是曰一馬之奔、無一毛而不動、一舟之覆、無一物而不沈

蓋聞嚴霜之零、無所不肅、長林之斃、無所不標、是曰楚塹既填、遊魚無託、吳宮已火、歸燕何巢

蓋聞名高八俊、傷于闔豎之黨、智周三傑、斃于婦女之計、是曰洪澤之蛟、遂挫長飢之虎、平臯之蟻、能摧失水之龍

蓋聞吳艘蜀艇、不能無水而浮、曰紅閒綠、不能無弦而射、是曰樊籠之鶴、寧有六翮之期、骯髒之馬、無復千金之價

蓋聞性靈屈折、抑鬱不揚、乍感無情、或傷非類、是曰嗟怨之水、特結憤泉、感哀之雲、偏含愁氣

蓋聞遷移白羽、流徙房陵、離家析里、悽恨撫膺、是曰吳起之去西河、潛然出涕、荆軻之別燕市、悲不自勝、

蓋聞廉將軍之客館、翟廷尉之高門、盈虛倏忽、貴賤何論、是曰平生故人、灌夫不去、門下賓客、任安獨存、

蓋聞執珪事楚、博士畱秦、晉陽思歸之客、臨淄羈旅之臣、是曰親友會同、不妨懷撫、悽愴山河、離異不妨風月、關人

蓋聞五十之年、壯情久歇、憂能傷人、故其哀矣、是曰譬之交讓、實半死而言生、如彼梧桐、雖殘生而猶死、

蓋聞秋之爲氣、惆悵自憐、耿恭之悲、疏勒班超之念、酒泉是曰韓非客秦、避讒無路、信陵在趙、思歸有年、

蓋聞懸鵠百結、知命不憂、十日一炊、無時何恥、是曰素王之業、乃東門之貧民、孤竹之君、實西山之餓士、

蓋聞胷中無學、猶手中無錢、今之學也、未見能賢、是曰扶風之高

鳳無故棄麥、中牟之甯越徒勞不眠

蓋聞十室之邑、忠信在焉、五步之內、芬芳可錄、是日南枯蚌、猗含明月之珠、龍門死樹、尙抱咸池之曲

蓋聞百尺之高、累于九碁之上、千鈞之重、懸于一木之枝、是日履虎尾而非險、傷龍鱗而未危

蓋聞居蘭處鮑、在其所習、白羽素絲、隨其所染、是日金性雖質、處劍卽凶、水德雖平、經風卽險

蓋聞豫章七年、斃于豐草、芳蘭九畹、淪于幽谷、是日欲求其真、晉陽有自理之蒿、若賞其聲、吳亭有已枯之竹

蓋聞明鏡蒸食、未爲得所、干將補履、尤可傷嗟、是日氣足凌雲、不應止爲武騎、才堪王佐、不應直放長沙

蓋聞勢之所歸、威之所假、必能繫風捕影、暴虎馮河、是日輕則鴻毛、沈水重則磐石、陵波

蓋聞意氣難干、非資扛鼎、風神自勇、無待翹關、是已曹劌登壇、汝陽之田、遽反、相如睨柱、連城之壁、更還、

蓋聞卷施不死、誰必有心、甘蕉自長、故知無節、是已螺蚌得路、恐異驪淵、雀鼠同歸、應非丹穴、

蓋聞北邙之高、魏君不能削、穀洛之鬪、周王不能改、是已愚公何德、遂荷鍤而移山、精衛何禽、欲銜石而塞海、

蓋聞君子無其道、則不能有其財、忘其貧、則不能恥其食、是已顏回瓢飲、賢慶封之玉杯、子思銀珮、美虞公之垂棘、

蓋聞水之激也、實濁其源、木之蠹也、將拔其根、是已延年之家、豫論埽墓、羊舌之族、先知滅門、

蓋聞磨礪唇吻、脂膏齒牙、陵風扇蕀、向影吹沙、是已敬而遠之、豺有五子、吁可畏也、鬼有一車、

蓋聞虛舟不忤、令德無虞、忠信爲琴瑟、仁義爲庖廚、是已從莊生

則萬物自細歸老氏則眾有皆無

蓋聞三關頓足、長城垂翅、既羈既旅、非才非智、是曰烏江、艤楫知無路可歸、白雁抱書、定無家可寄、

文苑英華七百七十一

賜進士出身二品銜廣東等處提刑按察使司按察使兼管驛傳事務苗王毓藻校刊

全後周文卷十一終



全後周文卷十二

烏程嚴可均校輯

庾信 五

秦州天水郡麥積崖佛龕銘

庾信作序

麥積崖者乃隴底之名山、河西之靈岳、高峰尋雲、深谷無量、方之  
鷲嶺、迹遁三禪、譬彼鶴鳴、虛飛六甲、鳥道乍窮、羊腸或斷、雲如鵬  
翼、忽已垂天、樹若桂華、翻能拂日、是已飛錫遙來、度杯遠至、疏山  
鑿洞、鬱爲淨土、拜燈王于石室、乃假馭風、禮花首于山龕、方資控  
鶴、大都督李允信者、藉以宿植、深悟法門、乃于壁之南崖、梯雲鑿  
道、奉爲亡父造七佛龕、似刻浮檀、如攻水玉、從容滿月、照曜青蓮、  
影現須彌、香聞忉利、如斯塵野、還開說法之堂、猶彼香山、更對安  
居之佛、昔者如來追福、有報恩之經、菩薩去家、有思親之供、敢緣  
斯義、乃作銘曰、

鎮地鬱盤基乾峻極石關十上銅梁九息百仞崖橫千尋松直陰  
兔假道陽鳥迴翼載輦疏山穿龕架嶺糾紛星漢迴旋光景壁累  
經文龕重佛影彫輪月殿刻鏡花堂橫鐫石壁間鑿山梁雷乘法  
鼓樹積天香嗽泉珉谷吹塵石牀集靈真館藏仙冊府芝洞秋房  
檀林春乳冰谷銀沙山樓石柱異嶺共雲同峰別雨冀城餘俗河  
西舊風水聲幽咽山勢崆峒法雲常住慧日無窮方域芥盡不變  
天宮文苑英華七百八十五

終南山義谷銘 并序

周保定二年歲次壬午七月己巳朔大冢宰晉國公命鑿石開谷  
文苑英華作闕之谷下南山之材維公匡濟彝倫弘敷庶績變理餘暇披閱  
山經已爲終南敦物日月虧蔽杻幹栝柏倚桐梓漆年代蘊積于  
何不有乃謀山澤之官兼列文苑英華作引衡虞之匠東出藍田則控瀾  
乘漣西連子午則據涇浮渭派別八溪流分九谷銅梁四柱石闕

雙聳

文苑英華作石閣雙啟

青綺春門、溝渠交映、綠槐秋市、丹戟相通、蓄之

則為屯雲、泄之則為行雨、青牛文棟、白鶴貞松、運昌冥宮、崇斯雲

屋

初學記作裁其梓匠此從文苑英華

千櫨抗殿、龍首干雲、萬頃疏苗、蟬鳴再熟、川

后讓德、山靈景從、豈知運后甘泉、纔通櫟陽之殿、穿渠穀水直繞

金墉之城、將事未勞、為功實重、國富人殷、方傳千載、因功立事、敢

勒山阿、銘曰

寥廓上浮、崢嶸下鎮、立壁千丈、橫峰萬仞

文苑英華作直立千丈峰橫萬仞

桂月

危懸、風泉虛韻、乘輿嶺阪、舉錡雲根、八溪分注、尤谷通源、北涵桐

井、南浮石門、撲象大狀

撲一作摸初學記作橫鴻大河

銀繩百堵、膠葛九成

文苑英華作竹

銀作規

徘徊千柱、桂棟淩波、梅梁垂雨、疏川翦谷

文苑英華作竹梁乘雨疏川翦

谷、落實摧柯、事均刊木、功侔鑿河

初學記五文苑英華七百八十七

玉帳山銘

玉帳寥廓、崑山抵鵲、總葉成帷、連雲起幕、玉策難移、金花不落、隱

士彈琴、仙人看博、巖面舊鼎、雲上新荆、漿石初爛、燒丹欲成、桑田  
屢變、海水頻盈、長聞鳳曲、永聽簫聲、文苑英華七百八十七又見蘇文類聚七言為庾肩吾作

吹臺山銘

江寧吹嶺、雖山出筠、春簫下鳳、此岫為真、青槐避日、朱草司晨、石  
名新婦、樓學仙人、中字玉成、南君姓秦、一作吳中、字秦、比花、依樹、登

榭要春、舞能留客、聲便度新、雕梁數振、無復輕塵、文苑英華七百八十八

望美人山銘

高唐礙石、洛浦無舟、何處相望、山邊一樓、峰回五婦、石是三侯、嶮

踰地肺、危陵天柱、禁苑斜通、春人常聚、樹裏聞歌、枝中見舞、恰對

妝臺、諸牕盡開、斜看已識、直喚便迴、豈同織女、非秋不來、文苑英華七百八十七又見蘇文類聚七言為徐陵作

至仁山銘

峰橫鶴嶺、水學龍津、瑞雲一片、仙童兩人、三秋雲薄、九日寒新、真

花霄落畫樹常春橫石臨砌飛簷枕嶺壁繞藤苗窗銜竹影菊落  
秋潭桐疏寒井仁者可樂將由愛靖文苑英華七百八十七

明月山銘

竹亭標嶽四面臨虛山危簷迴葉落窗疏看椽有笛對樹無風風  
生石洞雲出山根霜朝唳鶴秋夜鳴猿堤梁侶堰野路疑村船橫  
垓下樹俠津門寧殊華蓋詎識桃源文苑英華七百八十七

梁東宮行雨山銘

山名行雨地異陽臺春人無數神女羞文苑英華作看來翠幔朝開新妝

旦起樹入牀前山文苑英華作顏花來鏡裏草色文苑英華作綠衫同花紅面侶

開年寒盡正月遊春俱除錦帔併脫紅綸天絲劇藕蝶粉多文苑英華

生塵橫藤礙路垂柳係人文苑英華作弱柳低人誰論洛水文苑英華作一誰言洛浦

箇河神文苑英華七百八十七

刀銘三首

風伯吹鑪，雲師煉冶，鐵燄朝流，金精夜下，價重十城，名高千馬。

千金穎合，百鍊鋒成，光連斗氣，燄動山精，身文水動，刃古珠生。

斗精遙降，山靈下從，水文千曲，蛇鱗百重，燕砥斂刃，蜀水開鋒，氣

生分景，環成屈龍。

並文苑英華七百八十九

思舊銘

歲在攝提，星居鶉首。

文苑英華作監德

梁故觀靈侯蕭永卒，嗚呼哀哉！人

之戚。

文苑英華作賊

也。既非金石所移，士之悲也。靈有春秋之異，高臺已

傾，稷下有聞琴之泣。壯士一去，燕南有擊筑之悲；項羽之晨起，帳

中，李陵之徘徊岐路。韓王孫之質趙，楚公子之畱秦，無假窮秋于

時悲矣。況復魚飛武庫，像有棄甲之徵；鳥伏翟泉，先見橫流之兆。

文苑英華作肇

星紀吳亡，庚辰楚滅，紀侯大去，鄆子無歸，原隰載馳，轅轅

長別，甲裳失矣，餘皇棄焉，河傾酸棗，杞梓與檟櫟俱沈。

文苑英華作流海

淺蓬萊，魚鼈共蛟龍並盡。

文苑英華作與蛟龍共盡

焚香複道，詎斂冤魂。

文苑英華

作樊香復道  
詎假遊魂載酒屬車，靈消秘氣，芝蘭蕭艾之秋，形殊而共瘼，羽

毛鱗介之怨，聲異而俱哀，所謂天乎，乃曰蒼蒼之氣，所謂地乎，其

實搏搏之士，怨之徒也，何能感焉。彫殘殺嗣，無所假于風飄零落

春枯，不足頌于霜露。幕府昔開，賢俊翹首，爲羈終歲，門人謝焉。至

于東首告辭，西陵長往，山陽車馬，永別。文苑英華  
作望別郊門，潁川賓客

遙悲松路。文苑英華  
作慈路稽叔夜之山廬，文苑英華  
作盧尙多楊柳，王子猷之

舊徑，唯餘竹林。王孫葬地，方爲長樂之宮，烈士埋魂，卽是將軍之

墓。昔嘗歡宴，風月留連，追憶平生，宛然心目。及乎垂翅秦川，關河

羈旅，降于悲谷之景，實有憂生之情。美酒酌焉，猶思建業之水，鳴

琴在操，終思華亭之鶴，重爲此別。嗚呼甚哉，鱗亡星落，月死珠傷。

瓶罄罍恥，芝焚蕙歎，所冀。文苑英華  
作望鍾沈德水，聲出風雲，劍沒豐城。

氣連。文苑英華  
作存牛斗，潸然思舊，乃作銘曰：

風雲上慘，舟壑潛移，駸駸霜露，君子先危。紀侯大去，懷王不返，玉

樹長埋風流迷遠荀卿文苑英華作伯舊縣慶封餘邑萬里歸魂脩門詎

入城文苑英華作墳橫武庫山枕廬龍思歸道遠返葬無從徒畱送雁空

靡長松平陵之東無復梧桐松聲肅瑟長起秋風疇昔隆貴慘舒

文苑英華作提攜語默託情嵇琴文苑英華作阮風雲相得有酒如澠終溫且克

朝陽落鳳大野傷麟佳城鬱鬱流寓于秦山陽相送唯餘故人婦

機發緯獨鶴文苑英華作鳳孤鸞閨深夜靜風高月寒生平已矣懷舊何

期匣中絃斷文苑英華作絕鄰人笛悲昔為幕府今成總帷藝文類聚三十四文苑英

華七百九十

溫湯碑

咸池浴日先應綠甲之圖砥柱浮天始受玄夷之命仁則滌蕩埃

氛義則激揚清濁勇則負山餘力弱則鴻毛不勝仲春則榆莢同

流三月則桃花共下其色變者流為五雲之漿其味美者結為三

危之露煙青于銅浦色白于鉛溪非神鼎而長浮異龍池而獨浦



灑胃瀦腸與羸起瘡秦皇餘石仍爲雁齒之階漢武舊陶卽用魚  
鱗之瓦山閒湧水實表忠誠室內江流彌彰純孝豈若醴泉消疾  
聞乎建武之朝神水蠲痼在乎咸康之世嵩山三仙之館不孤擅  
于天池華陰百丈之泉豈獨高于蓮井

藝文類聚九  
初學記七

### 陝州弘農郡五張寺經藏碑

蓋聞如來說法萬萬恆沙菩薩轉輸生生世界豈直優波提舍祇  
夜脩多而已哉是已熙連禪河質多羅樹七處八會三清四說皮  
紙骨筆木葉山花象負之所未勝龍藏之所不盡雖復銀函東度  
金甌南翻秦景遙傳竺蘭私記譬猶得海水之一珠不下崑山之  
片玉若夫法雲深藏師子雷音梵志往生聲聞說戒雪山羅漢之  
論驚嶺菩提之法本無極際何可勝言弘農五張寺者南陽張元  
高寓居此地昔者千金之族見徙五陵大姓之民移家六郡蓋其  
流也元高五子負荷遺訓離經辨志竝是成名入室生光咸能顯

德加已尊承慧業敬受法門兄弟同居共捨爲寺伽藍肇建卽已  
五張爲名是知城居趙信仍名趙信之城殿入蕭何卽號蕭何之  
殿加已象馬無慘衣裘是捨春園柳路變入禪林龕月桑津迴成  
定水平輿雖盛豈可獨擅二龍扶風最良不得專稱五馬寺主三  
藏大法師法映邑主洛州刺史張隆等財行法檀身心罄竭兼化  
鄉邑道俗數千敬造一功德輪見成三百餘部雷篆雲書金繩玉  
檢削蒸栗之簡裝酸棗之珠竝入香城咸封禪閣坐堂伏檻羌非  
湘水之神綠房紫的足擬恭王之殿高掌西望長河北臨鼎氣常  
浮爐煙咸起戶牖寥廓吹萬龍門之風梁棟崢嶸落客河源之樹  
僧徒雲集不遠敦煌之坡學侶相奔更合華陰之市兩陝昔分寶  
基王化二陵今阻翻馳羽檄虞公屈產交亂風塵召伯甘棠凋零  
霜露雖復兼能共治未遣渡河之獸烽柝是警實擾移關之民是  
已法王御世天人論道汲引四流周圓五怖故能調伏怨憎消除

結縛法水津梁得無砥柱之難香山轍迹非復終南之險天子命  
我試守此邦墨竈未黔孔席無暖纔臨都尉之境卽有樓船之役  
旣而南風不競北道言旋幕府旣閒邦君且止鄉俗耆老依然此  
別屬茲法事須尔制文聊曰課虛爲銘云爾

舍衛之國祇洹之園三明極地八會窮源連河競說勝辯爭論波  
提東度祇夜南翻非空卽色離有無言達人止是獨悟重昏身雖  
繫鳥心避騰猿禪樓卻月義殿翔鵠迴風香蓋反露珠幡西臨砥  
柱東背輶轅河鳴陽硤山響蘇門翔禽歌嘽流澗絃喧度河餘獸  
移關舊村昔爲畿服今成塞垣城疑廣武地侶樓煩耀烽竝照象  
馬單奔無鍾襲舊有兩圍原不資十方誰釋三怨風傾地柱火及  
天元銀鉤永固金牒長存封君馬首方事南蕃言從楊僕請謝劉

昆

大苑英華  
八百五十

周上柱國齊王憲神道碑

昔者軒皇受姓十有四人周室先封十有五國自爾承基纂冑保  
姓受氏雖復千年一聖終是百世同宗故知昔之東京既稱大漢  
再受今之周祿卽是鄴都中興公諱憲字毗賀突恆州武川人也  
晉太康之世據有黃龍魏孝昌之初奄荒立菴太祖已百二諸侯  
三分天下函谷先登鴻溝大定功業如此人臣已終公含章天挺  
命世誕生降太一之神下文昌之宿珠角擅奇山庭表德儀範清  
浴風神軒舉聳動廊廟光華城闕未逾齟齬已議論天下事人或  
曰是謂弱木一枝旁蔭數國長河一直自然千里風颯欲遠光景  
將昇後魏二年封涪城縣開國公時年五歲也虹蜺滿野是廢當  
途之高驚鷺鳴岐寶始維新之命國家光宅受圖欽明秉厥大風  
初卷長沙始封周元年進爵安城郡公食邑二千戶仍授使持節  
驃騎大將軍開府儀同三司開府同于馬駿秩擬六卿驃騎等子  
劉蒼位高三事宗子維城彼多慙色武城二年授使持節大將軍

都督益壽寧等二十四州諸軍事益州刺史改封齊國公食邑萬戶公時年十有六王武子曰上將開府未滿立年荀中郎爲十州都督才踰弱冠方之于公已爲老矣加復營丘負海齊桓公受脤之城岷山導江漢武帝求仙之地自非名陵孤竹聲振沈黎豈得南至穆陵西登積石幸無白虎之患寧待黃龍之盟叩笮畏威微盧仰德生爲立廟刻石頌功成都有文翁之祀非謂生前漢陽有諸葛之碑止論身後比之今日豈可同年而語哉保定四年與大司馬蜀國公圍金墉城師臨洛浦則廣武營奔兵上邙山則河橋路斷八川風俗五方名利鐵市銅街風飛塵起天和元年徵還行雍牧公曰日月之明威神其政漆沮旣從荆岐卽又少陽用事路不喘牛仲秋曰殷民無驚水二年拜大司馬仍理小冢宰營室殿軍器太監天官曰邦國爲基是司六典夏官曰兵戈爲主專謀七德是曰器械填委旣包吳漢之功宮殿崢嶸彌壯蕭何之法時曰

白露涼風務閑農隙督兵三萬出自宜陽拔伏龍之城平姚萇之  
壘馬陵削樹魏將路窮平陰聽鳥齊師其遁天子冢弟禮絕羣公  
仁義所往事資道德建德元年進爵爲王仍拜大冢宰姬旦封于  
曲阜不廢居中劉交國于彭陽無妨常從豈直周召二南竝居師  
傅晉鄭兩國俱爲卿士而已哉匈奴突于武川燿火通于瀚上公  
述職巡御治兵朔方馬邑星飛龍城月動撓爾犂之酒經略不前  
失煙支之山下馬而去東鄰逆命反道敗德囚箕子于塞庫羈文  
王于玉門天子將有孟津之師召公獨議公報曰誕應天命克成  
厥勲昔者秦昭起師于蜀直問張儀晉武用兵于吳惟謀羊祜于  
是中軍無帥僉曰有歸五年拜上柱國元戎東討給王鐵騎二萬  
先襲太原斗建麾兵天離轉戰虎嘯風騰雲飛電掩林胡棗栗詎  
得充飢晉陽荻蒿何能拒防又加王精兵六萬長圍晉州然後六  
軍星陳萬騎雷動中權始及前茅已戰自爾卽爲前鋒橫行入鄴

觀彼車結槐本馬驚旋濫積甲高昆陽之城戶封塞富平之水莫  
不如彼建瓴同斯破竹一朝指揮六合大定是用光照下武翼亮  
中都足已攄祖宗之宿憤解生民之怨黷方當待彼石閭部斯王  
鼓經緯天地光華日月旣而赤烏夾日黃熊入寢實沈無祀桑林  
不祭宣政元年六月二十八日薨春秋三十有四季友之亡魯可  
知矣齊喪子雅姜其危哉公器宇淹曠風神透遠璣鏡照林山河  
容納置鐔待酌懸鍾聽扣聲動天下光照四鄰武皇帝曰介弟懿  
親特重愛友而密謀奇策加禮敬焉常謂左右曰孔子云自吾有  
回門人日親其齊王之謂也用之作宰則萬方協和用之撫軍則  
四表懾伏豈直皋繇爲士國無不仁隨會爲卿民無羣盜愛翫書  
籍敦崇禮樂管絃入耳則溪谷俱調文雅治心則煙霞竝韻養由  
百發落雁吟後應奉五行綈綳縹帙雍容舉止抑揚談論當世已  
爲楷模縉紳已爲軌範則少有壯志頗校兵書玄水降靈穀城受

策飛風長柳月角星宿莫不吟誦在心撰成于手所著兵法凡有五卷六韜九法不用吳起舊書三令五申無勞孫武先誠可謂有忠孝焉有壯武焉不自驕矜謙光下物宋人獻玉不貪爲寶伯皮子高守仁爲富不謂曰信致欺爲善非樂天年不享嗚呼哀哉曰某年月日葬于石安縣洪瀆川之里原隰悽愴埋于盛德幾年丘陵搖落蘊于才良永矣乃爲銘曰

悠哉朔方逖矣窮陰山連鳥道地盡龜林重黎業大伯翳功深冒其積德必有君臨大祖撥亂喪君有君功迴地軸策動天文猶臨赤水尙覆黃雲諸侯八百天下三分公之挺生實惟天假翠微神降文昌星下照于四國充于兩社舟楫江河棟梁華夏水涌詞鋒風飛文雅純深之性地極天經忠貞之道事感百靈君親惟一臣子惟靈忠泉出井孝筭生庭乃宰天官爲國之輔是居上將爲天之柱乃聖乃神惟文惟武策高開闢威移雲雨九宮神略三術謨



明天離轉陣、月德迴兵、黎陽水駭、官渡山驚、冀州旣載、東原底平、  
溟波欲運、弱木將危、中峰岳斷、半海鵬垂、鳳沈丹穴、龍亡黑陂、臨  
淄廢市、東武山移、千齡萬古、英聲在斯、文苑英華  
八百九十

賜進士出身一品銜廣東等處提刑按察使司按察使兼管驛傳事務岡王毓藻校刊

全後周文卷十二終

全後周文卷十三

烏程嚴

庾信

周太子太保步陸逞神道碑

公諱逞字季明本姓陸吳郡人也君子至止旣紹虔賓鳳凰于飛  
實興齊國南越使者解漢帝之衣西陵將軍覆吳王之蓋曾祖載  
爲宋王司馬留鎮關中赫連之亂仗劍魏室黃河參陵或亡追路  
烏江艤船更無歸迹今爲河南洛陽人也高祖冠軍將軍滎州刺  
史吳人有降附者悉領爲別軍自是官師擁鐸更爲吳越之兵君  
子習流別有樓船之陣父政驍騎大將軍儀同三司恆州刺史中  
都獻公太祖扶危濟傾經綸夷阻報君之恥遠襲平原已高平霸  
業所基委命留事關中餽食非直滎陽之飢河內供軍豈但洪園  
之竹公秉照晉之靈降明神之德猛虎振檻七年不驚羝羊觸藩

九齡能對諸兄曰公先君愛子稱之曰仁推而襲封雖復季末大

成之心守節

疑有闕誤

既遭燻穴翻從壓紐太祖初封函谷始合諸侯

曰公詞令參謀機密故得戎政克宣師言無滅賜姓步陸孤氏委

鹿貉而論都人鴻門而舞劍方之吹律綽有餘榮出身羽林監輕

車將軍除尚書右丞官聯會計務殷平準水衡貫朽常平粟紅授

使持節車騎大將軍儀同三司增邑千戶尋遷駕部中大夫領兵

部中大夫領蕃部東京鼎食先加鄧隲之勲西晉官人多用山濤

之啟豈若五王登朝必司賓主之禮六龍御轡取定鸞和之節御

正曰官觸父名不拜會稽有王會之名其子不爲太守博陵有王

沈之封其兒不爲刺史遷驃騎大將軍開府入掌納言治司宗伯

又爲軍司馬職居常伯勤問于南宮位管王言連官于北斗豈止

郊天祀地龍門嶰谷之聲贊鼓頒旗白露涼風之月闇夜有人餉

羅數十匹公閉門不受行人干觸其曰聞奏朝野稱之大尉揚震

直推故吏之金涼州張奐高岸先人之馬清畏人知我無慙德齊  
國通和封人受使曰公有出境之才見命張旌之禮既珠盤歃血  
定楚國之連名匕首登壇反齊人之侵地是謂使乎固稱光國三  
輔公侯五陵鍾鼎銅街柳市塵起風飛乃授京兆尹增邑通前一  
千六百戶餘官如故上林兵息蘭池盜靜不學王陽平生鑄金之  
術未同張敞終日章臺之遊家僮暮行還得遺錢于道并白絕十  
匹公訪得其主卽已還之見金于路指曰示人得錢于道畱持挂  
樹方之今日異代同風俄遷司會治小司馬重總六軍再操八柄  
考績入于歲成論功書之年表尋授都督宜州諸軍事宜州刺史  
露冕觀風停車待雨百城解印樞朱穆之威千里相迎受王基之  
德曾未朞月被敕追還眷眷吏民不無河內之請依依故老實念  
黎陽之別少陽養德前星守器尊師讓齒必俟賢能乃授太子太  
保方之劉寔道高于大邦譬曰山濤榮深于小輦本有消渴之疾

常餽金石自理舊疾微增奄捐館舍茂陵之下不畱封禪之書校尉之營惟餘服食之器嗚呼哀哉春秋四十有七建德二年五月十一日也天子曰大臣之喪躬輟聽訟東朝曰師傅之尊親臨攢祭詔贈某官諡某公禮也己今三年正月十日葬于京兆之高陽原夫人郁久閭西遇王姬愛敬肅恭言容令淑有聞箴黻無廢紘緼爰在盛年先從大夜今節婦開墳松柏已拱季孫成寢丘陵始同汎復圖畫賢妃方在甘泉之室瘞埋才子卽用高陽之原公儀表外明風神內照器量深沈階基不測事君惟忠事親惟孝言爲世範行爲士則畱連墳索悵悵文詞霜府錄于尙書天官總于司會出入匡贊常帶數職身具六龜腰恆四綬陳平密謀既非天子所見荀彧上策又非諸侯所聞其爲郡也惟取赤土封書其爲州也唯已青鹽換粟畱家則千樹無資遺子則一經而已嫡子操至性過禮純孝不遺墳前之樹染淚者先枯庭際之禽聞悲者則下

銘曰

山連日觀，水枕瀕機。宮春沙起，間陽柱飛。大夫屈節，將軍振威。南  
越受史，西陵解圍。昔我烈祖，垂翅秦中。白馬無路，烏江不通。笛吟  
鄉里，琴哀土風。營州恆州，擁旄世載。壯節旃衿，人雄關塞。直河穿  
趙，平雲臨代。生謂立功，沒爲留愛。降茲岳瀆，誕此貞明。祥符雲氣，  
慶合星精。宮帷定策，殿柱書名。忠泉暗瀨，孝筭寒生。世屬殷周，時  
逢楚漢。天下三分，鴻溝一半。已我明略，來參匠贊。日乃再中，天成  
兩旦。遽參三事，歷副六卿。天師光宅，地載謨明。春官定禮，夏官治  
兵。識言默識，溫樹無名。謙恭周密，言行無乖。忠公兕觥，陰德虵埋。  
軍國紛總，部領填階。馬不人廢，金不人懷。具瞻惟德，高山惟仰。甲  
觀初登，龍樓初上。東國桓榮，西京疏廣。年齡俄頃，風電相推。銘旌  
兩沒，池柳雙迴。熒熒脂子，御疾銜哀。身彰野火，心懼天雷。日月其  
除，榮終哀始。馬歸司隸，書還太史。麻對天星，墳連地市。山勢接飛

松形蓋起德音無絕平原忽矣

文苑英華九百

周大將軍崔說神道碑

周書作崔說

公諱說字某博陵郡安平縣人也昔者華陽之野降龍首之神烈山之都啟龜文之繇匡周則盟津有會佐夏則龍門始鑿西遊則起家秦相東入則載世齊卿備乎史籍可得言矣祖辨中軍將軍定州刺史父楷鎮北將軍司馬烈侯竝膺風霜俱張鋒穎郎史特迹官曹懷然是謂鮑恢都官百城振懼葛豐握節京師斂手公特稟英靈偏鍾山岳雄姿俊茂睂目疏朗觀虎于檻韶髮不驚稱象于舩勝衣能對至于拉虎羈熊摧班碎掌忘歸繁弱落雁吟猿故得氣蓋關中威申河外解褐領軍府錄事轉諮議參軍時當塗失御政在權門始論函谷之兵卽起韓陵之戰太師賀拔勝作牧西荆公爲假節冠軍將軍防城都督大疑作及南陽失守卷甲奔梁樂毅羈旅猶思燕路陳軫悽愴終戀秦聲幸直和鄰言歸舊國授衛

將軍都督封安昌縣開國子食邑三百戶弘農剋復沙苑揮鋒進  
爵爲侯增邑并前一千一百戶信珪則更受司勳穀璧則還輸典  
瑞鐵馬有河橋之戰戈船有汾水之兵除京兆太守移民下邑未  
學邊韶走馬章臺不同張敞遷帥都督持節撫軍通直散騎常侍  
大都督尋遷使持節車騎大將軍儀同三司都官尙書定州大中  
正五曹奏事有朱穆之忠九品論人見楊喬之直改封安國縣侯  
益邑合前一千四百戶賜姓宇文改名爲說漢王改嬰敬之族事  
重論都魏后變程昱之名恩深捧日遷驃騎大將軍開府儀同三  
司加侍中寶憲連官單于之寶鼎可致張寬固位渭橋之流星可  
識攻木七工旣掌丘陵之賦司會六典乃均邦國之財居官得人  
于斯爲盛進爵爲公改封萬年縣前二千四百戶除隴州刺史  
都督隴州諸軍事隴坻路遙秦川望遠鄧仲準之不去馬文淵之  
願歸尋除涼州刺史總督河西甘瓜諸軍事地似伏龍城如飛鳥



敦煌實錄宛在冒襟玉門亭障無勞圖畫有馬如羊不曰入廐有金如粟不曰入懷柱國齊王今上之介弟翼行薄伐間罪河陽曰公爲行軍長史參謀帷幄中軍之司旣舉魏絳上卿之佐實用荀林曰公方之差無慙德除使持節大將軍大都督崇德安義建忠九曲安樂三泉伏流周張平泉固安蠻通谷凡十三防禦熊和中三州黃蘆起谷王晏供超牽羊溫孤交河大嶺避雨木柵寺一十成諸軍崇德防主宜陽上地更有秦兵熊耳山前還逢積仗用是連營函谷獵騎黎陽威振兩河名陵三晉改封安平縣公淮陰一國韓信之故人戶牖萬家陳平之鄉里公此衣錦足爲逆類建德四年正月十日薨于長安之永貴里私第春秋六十有四詔贈敷延丹綏恆五州諸軍事敷州刺史諡曰莊公禮也卽日其年二月二十四日葬于京兆平原鄉之吉遷里北陵追遠大司馬有賜綬之恩西京贈行冠軍侯有詔葬之禮嗚呼哀哉世子儀同衍生事

曰禮死葬曰禮愛親有王祥之孝同氣有姜肱之睦百行之本于斯備焉沉復松檟深沈既封青石之墓尸一陵標榜須勒黃金之碑乃爲銘曰

華陽之神厲山之祖鳳野匡周龍門佐禹日浴溟池山浮海浦甫穆霸國營丘樂土脩斯宗邑承此壤土之移封東武就君安陽中軍節目鎮北鋒芒商飈獵草電火驅霜公之輪奐繼體貞幹儀表丘墟風神牆岸孝有至德忠能匡贊不廢橫琴無妨敲案既班三事又貳六官衛青受詔韓信登壇長城馬窟廣武兵憫軍吏無犯營民不寒乃用六謀乃論三策城壘向背星辰主客劍起沈犀弓開伏石楚后讓盟秦君還璧百齡危脆千仞摧藏諸侯地裂邊將星亡輕車騎士玄甲黃腸社如齊地廟侶桐鄉銘功贊德碑闕相望

文苑英華  
九百四

周大將軍司馬裔碑

公諱裔字遵胤河內溫人也昔顓頊之命始則南正司天重黎之後又曰羲和掌厯夏陽適晉得隨會而同奔東海避秦與毛公而俱隱其後金行受命玉笥南遷帝系極于輿圖中朝至于江表曾祖楚之晉太傅錄尚書揚州牧會稽文孝王之次子元顓之幼弟也元顓見害之後桓立篡逆之初爰自齟齬客身屠釣河內道左抱劍長號代郡城前慟悲靈祭江淮志節之士汝穎風塵之客感激一言咸多依附旣而雲生伏龜星出鯨魚太白經天蚩尤映野公乃收合餘燼泣血登埤臨武牢之關據成皋之坂擁眾萬家歸于魏室魏明元皇帝遙授平南大將軍荊州刺史襲封琅邪郡王尚河內公主命王承制從賓國之儀于時宋兵憑陵旗鼓侵逼虎牢不封金墉無援魏太武皇帝授王使持節侍中安南大將軍開府儀同三司給前後部鼓吹見城啟行志雪冤恥登壇慷慨三軍掩泣黃河漕粟已出石門白馬連旗將臨野坂旣而雲中析起代

郡烽燃反旆南轅途窮北略昭征西大將軍都督梁益秦寧荆兗  
青豫鄆洛十州諸軍事揚州牧司徒諡貞王祖金龍封琅邪鎮西  
大將軍儀同三司吏部尚書贈司空諡康王父悅鎮南將軍豫州  
刺史漁陽莊侯已判河刺舉時值亂離釁起蕭牆遂終非命公遺  
腹載誕流離寇逆復壁繼負深山擁樹程嬰之匿趙武從役家臣  
王成之藏李燮爲備酒市遭太夫人憂苦草墳塋已終灰燼形骸  
毀瘠逾于喪禮年十有五始幹家事楹前鑿柱卽取遺書石上開  
松仍求故劍出身司徒府參軍除中堅將軍員外散騎常侍值魏  
室多難所在蜂起孟津已北無復封畿嵩山已南卽爲鋒鏑公建  
議脩武立柵溫城函谷西封河橋北斷長亭籍馬竝入武城百里  
租車咸輸溫縣太祖文帝締構關都經綸夷阻招攜已禮懷遠已  
德馬文淵之擇主去隴坻而歸身實周公之入朝在河西而奉詔  
大統七年蒙授平東將軍北徐州刺史十年河內故義四千餘家

願立忠誠須公衣錦乃授使持節領河內太守加前將軍懷州拓境兩鎮奔波柳泉轉戰三城授首十三年太祖召山東諸立義之將能率眾入關者有加重賞公率先而至領戶千室卽已爲封固辭不受其菽粟之賜或已指困馬牛之賞將同量谷朝廷已華陽西極漢水東流歎孟達之奔兵怪劉封之失策魏前元年移鎮漢中除白馬城主領華陽郡守昔稱導漢今聞上潞烟沈冰井雨歇雲門其年授大都督加散騎常侍柱國蜀國公開金牛之道通牧馬之關公卷甲北塞懸車束馬遂得策預葭萌勳參綿竹封龍門縣開國子蒲州刺史仍領新州尋授使持節車騎大將軍儀同三司大中正隆周受圖天保大定已公才望仍爲舊臣遂乃義深追遠恩隆繼絕卽改封琅邪縣公邑五百戶仍遷驃騎大將軍開府儀同三司都督巴州諸軍事巴州刺史武成二年被敕赴援信州魚復道阻屢卻岑彭荆門水急幾沈吳興公乃月峽先登瞿唐直

上天子曰公操履忠勤儀刑亮直乃徵爲大御伯尋轉大御正邑  
一千一百戶樞機近侍出納絲言所謂多識舊章殿中無雙者矣  
四年大將軍東討公所領義眾先守枳關授都督懷州諸軍事懷  
州刺史偃師張慕河陽牧馬雖接戰于富平已連營于官渡五年  
詔追還拜始州刺史更封信州賊山彰尋寶渝恃險峽路五尺絙  
釣纜通縣水三門橋飛濟渡旣而風行草偃谷靜山空前後平十  
一城獲九千餘口馬歸平樂金輸水衡天保二年除信州刺史都  
督信州諸軍事朝發白帝暮宿江陵氣振巴丘之兵威警建平之  
戍五年遷潼州刺史益州柱國公降帝子之重鎮天井之星延閣  
擬千叢臺岷山方于代郡公仰稟雄謀參謀遠略故得身預舞陽  
之功位極長平之寵六年授使持節大將軍大都督西寧州諸軍  
事西寧州刺史方欲關沫若徼牂柯見夜郎之侯習昆彌之戰而  
飛鳶墮水馬援去而無歸金馬騁光王褒行而不反嗚呼哀哉七

年正月十日薨春秋六十有五詔贈使持節大將軍懷邵汾晉四州諸軍事懷州刺史夫人襄城公主魏獻帝之曾孫趙穆王之季女王姬肅恭瑜翟典禮四教競莊三星令淑有光隆慮之賢足表平陽之盛生則從夫曰秩死則同穴曰禮建德元年八月十二日合葬于武功三時原大夫墓樹曰柏諸侯墳高于雉吁嗟滕公來居此里詔諡定公禮也公資忠履孝蘊義懷仁直幹千尋澄波萬頃逢蒙射法力牧兵書星辰高下之占風雨逢迎之氣故得師出已律天幸將軍者也至如官曹案牘未常煩壅戎馬交馳不妨餘裕足使四岳彌峻三台更明在朝四十一年身經一百餘戰凡任四郡歷八州未嘗曰貨殖經懷去如始至渭南千畝之竹更懼盈滿池陽二頃之田常思止足身歿之日家無餘財素車白馬狹室崎嶇黃腸立甲階庭仄陋有詔冬官爲營寢室朱邑祭酹無所漢后是曰賜金陳表妻子露立吳王爲之間館嗚呼哀哉世子侃孝

家忠國揚名顯就是已勒此豐碑懼從陵谷殖之松柏不忍凋枯  
銘曰

欽若厯象平秩寅賓少梁奔華地入咸秦族夷興馬書窮獲麟玉  
鏡云始金行乃構象浦通關龍沙開侯上穆后起河陽水關五馬  
南溪三星東宿太傅作牧奄有江淹司徒避亂承制荆河既勞推  
轂猶思枕戈龍媒被野蒼兕凌波莊侯季年禍機相接誕公遺嗣  
崎嶇懷挾山竄趙武家藏李燮伍員道阻燕丹路遙南奔楚塞北  
避秦橋水流登壘寒風度遼有功都護則重嫖姚懷書上馬習禮  
從戎陣圖六甲兵占八風藏松寶劍射柳珣弓推誠賈復屈節廉  
公八翼頻飛六條亟秉勇此仁義行茲寬猛持印山開沈黎盜靜  
取甲無上均田不井懋功賜爵上將賞官軍中受詔塞外登壇方  
圖參合更鑿皋蘭渝山毒水燹道災氛地亡都尉離悲使君谷寒  
無日山空足雲北風吹旄秋霖泣軍遺奠雙設銘旌兩布泌水同



墳平陽合墓悲哀嗣子攀號靡訴慟甚風枝悲深霜露自此何世  
從斯幾年麒麟欲闢華表中燃地形樓起松心蓋圓茫茫丘壠代  
代英賢

文苑英華  
九百四

周柱國大將軍拓跋儉神道碑

蓋聞放勛立而義和昇重華登而元凱用思皇多士既成西伯之  
功俊德克明乃定南巢之伐是知惟賢非后弗食惟后非賢弗父  
若夫君臣一德啟心沃心見之昌寧文公矣公諱儉字慶明恆州  
高陸人也北岳天孫之星燕河帝子之國故多奇節甚茂華風高  
關圖南二王齊軫長城拔本十族分源高祖太尉北平王光輔五  
君允釐百揆恆衛旣從淮沂其乂祖豹龍驤將軍恆州刺史常山  
刺舉非無取代之符龍驤總戎或似平吳之號父鉞羊止弱冠榮  
終解印公曰五常蘊智六氣資德乘天則策馬秉靈降神則牽狼  
應象直心于物水火恬然無負于天雷霆不懼富貴自取豈資唐

舉之言聲名有聞無勞李膺之識年十八解褐員外散騎侍郎尋授輕車將軍羽林監太祖文皇帝駕馭天綱苞羅英傑選公才德光佐中書諸葛亮之西歸王勳成三分之業管夷吾之人仕葵丘有一匡之功天水黠羌漁陽羣盜乃遷秦州刺史長史防城大都督封信都縣開國伯三年滑州蟻聚保障沈命靡旗亂轍乘冰渡河丞相大行臺授假節撫軍行滑州刺史大統元年授持節西夏州刺史加散騎常侍郅支抱馬如聞耿秉之戰單于願識似畏王商之威五年遷使持節鎮東將軍都督東北三夏州諸軍事西夏州刺史增邑千戶改伯爲公旣而江漢遼遠車書寂寞蜀主的顧未出檀溪之水秦王飛雉猶向南陽之城六年召公爲使持節都督三荆二襄南雍平信江隨郢浙一十二州諸軍事荊州刺史東南道行臺僕射楚城鄰境實有讓田吳人對營無妨贈藥部內屬城爲人所訟公遂集文武肉袒自罰兄弟不讓延壽責躬吏民有

過翁歸引咎。天子異之。璽書勞問。賄賄加幣。王人接踵。大丞相書云。此之美事。耳目之所未經。歎尙無極。故遣專使。公善于撫馭。長于接引。山藪無棄。苞苴不行。示人赤心。與人顏色。盜不敢發。民不忍欺。至是將校耆老。于州城之南。起清德之樓。勒賢臣之頌。杜鎮南之作。牧當世樹碑。竇車騎之臨戎。生年刻石。方之今日。彼獨何人。于時戶口日增。荒萊畢墾。華實紛敷。黔黎茂豫。但恐夜職有關。待公而補。鼎飪未和。須公而正。是日漢陰民望荆南杞梓。竝皆上書詣闕。連名乞畱。河內之借寇。尙更慙。謁帝。交州之請士。燮還著土表。九年授車騎大將軍儀同三司。十二年除大行臺尙書。仍爲大丞相司馬。日公識度嚴明。志節清儉。遂改公名儉。字慶明。非關書月。詎待看碑。幸得千畝不同。二山無廢。十三年加開府。餘官如故。十四年除尙書右僕射。加侍中。進驃騎大將軍。居上屋。執法在文昌之位。日公才望兼而有之。十五年更除東南道行臺僕射。都

晉十五州諸軍事行荊州事十六年大丞相總十六軍剋清河洛  
公又中分麾下參謀幃幄高選霸僚公爲長史其年加都督南道  
三十六州諸軍事餘官如故南陽文舉更遇王基章華袞衣還迎  
郭賀昔日伐蜀之謀張儀與秦昭計合平吳之利羊祜與晉武意  
同太祖始定成都卽有江陵之志公密獻其策懸符深旨糧運久  
積梯衝立備一戰而舉鄢郢再戰而燒夷陵遂得席卷三荆此又  
公之勳也詔賞奴婢三百口太祖與公書云由公立計果何所謀  
公頃自鎮江陵曰安蜀地後魏二年改武川昌寧郡開國公歷陽  
居民非唯景丹之封曲逆戶口豈但陳平之國其年授大將軍太  
和之中曹眞于府內受冊元封之末衛青于軍中卽拜公之此比  
綽有餘榮詔曰吳人未復須助謀謨今使梁王兵馬受公節度三  
年加都督東南道五十三州諸軍事增邑萬戶維周革命光宅欽  
明作貳天官允諧邦治元年授小冢宰保定二年治蒲州刺史檢

校六防諸軍事四年治襄州仍授柱國大將軍餘官如故秩登四  
岳階平六府豈不功重昭陽名高蔡賜控馭五十州風行數千里  
拔園葵而去織婦無三惑而絕四知一室之中未免虛白日膳之  
資三杯而已詔乃賜緡絲一千段粟麥二千斛天和元年陝州刺  
史都督八州二十防諸軍事解荊州總管餘悉如故路出王官城  
臨河曲成清陝右高視棠陰部領宴煩晦明爲疾天和四年謝病  
故京薨于私第春秋七十有八變躡降臨軒懸輟樂九旒龍旂之  
錫三河騎士之送詔贈太保涼夏靈銀長原河鄯甘瓜十州諸軍  
事涼州刺史諡曰文公狀貌丘墟風神磊落玉山秀立喬松直上  
烟霞之涯際莫尋江海之波瀾不測少遭荼苦在山服終攀柏樹  
枯侵松獸死盡忠事國竭力從政其門如市其心若水奇策密謀  
百僚仰止忠貞亮直明主敬焉至如風后陰陽之占力牧星辰之  
度魏公子之兵書李將軍之射法莫不成誦在心取爲時用居常

服翫或曰布被松牀盤案之間不過桑杯石鼎遺令山陵一無所用公私贈襚竝不得受止依太祖陵側無忘事君墩等兄弟竝至性善居喪號慕墳塋奉遵遺訓是曰衛青之塚仍陪漢武之陵管仲之墳卽接齊桓之墓天和六年天子曰四海未寧三方鼎峙有懷將帥之志言念封疆之臣旣畫雲臺乃題麟閣更贈公爲鄆國公邑五千戶追崇列辟事極神魂再改銘旌恩隆封墓公在民留愛身後見思吉日良辰郊祠野祭儀同趙迢等六百九十七人表求立廟陳請象魏有詔許焉桂棟杏梁綠墀青瑣案歌會舞鳳蓋霓裳南浦送而行雲東風颯而零雨是知漢陽郡前非徒武侯之廟臨淄城下豈獨樂公之社嗚呼哀哉乃爲銘曰

道鍾屯剝世屬雲雷地軸左轉天關北開客車周室繫馬秦臺乃齊七政爰荅三才烈祖燮諧九龔梁棟取才逢獵求賢入夢匡贊官雲謀猷紀鳳律定公族珪分職貢乃惟嗣德實秉英靈身圖斗

荷面繞樞星青衿敬業童子離經信陵虛左干木分庭忠孝純深  
樞機周密孔光下言曹參勿失溫席扇枕承顏悅膝陳蒲魚鰲寒  
林笋出肅肅風政沈沈器局直似貞筠溫如瑞玉清不置水明非  
舉燭馬願如羊金須似粟上將克昇元戎卽序夏陽三捷夷陵一  
舉憑軾下齊凌江入楚鼎反厯室鍾歸大呂六卿咸事天官是司  
二南作伯棠陰實治清風有頌綠竹聞詩贈行之冊超然帝師昔  
侍蘭苑今陪杏林死生契闊無違一心風雲積慘山障連陰陵田  
野寂松逕寒深夏嬰之隴橋玄之墓馬見千年車回三步左無長  
樂前非武庫直望高碑增悲行路

文苑英華  
九百五

賜進士出身三品銜廣東等處提刑按察使司按察使兼管驛傳事務黃岡王毓藻校刊

全後周文卷十三終